

Ո Ր Ո Շ ՈՒ Մ

Ճանապարհային ոստիկանության վարչական իրավախախտման վերաբերյալ գործով
05.09.2020թ. կայացված ԱՖ470983 որոշումն անփոփոխ, իսկ վարչական բողոքն առանց
բավարարման թողնելու մասին

<<08>> 10 2020թ. 7-13- 12658

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Սմբատ Այրումյանի ՄԴ/134083-20 դիմումի քննարկման արդյունքում ստեղծված
նյութերը՝

Պ Ա Ր Զ Ե Ց Ի

Երևան քաղաքի Սայաթ-Նովա պողոտայի 21 շենքի 4 բնակարանի բնակիչ Սմբատ
Այրումյանը դիմումով խնդրել է բեկանել Ճանապարհային ոստիկանության վարչական
իրավախախտման վերաբերյալ գործով 05.09.2020թ. կայացված ԱՖ470983 որոշումը՝ նշելով,
որ նշելով, որ ավտոմոբիլը վարել է ծայրահեղ անհրաժեշտությունից ելնելով: Միաժամանակ
հեռախոսակապի միջոցով պնդել է դիմումում նշված հանգամանքները:

Դիմումի քննարկման արդյունքում պարզվել է, որ վարչական իրավախախտման վերաբերյալ
գործով 05.09.2020թ. կայացված ԱՖ470983 որոշումը ենթակա է կատարման հետևյալ
պատճառաբանությամբ.

Վարչական իրավախախտումների վերաբերյալ ՀՀ օրենսգրքի 126-րդ հոդվածի 1-ին մասի
համաձայն տրանսպորտային միջոցները ոչ սթափ վիճակում վարելը, եթե վարորդը միայն
ալկոհոլի ազդեցության տակ է, և զանցանքը չի պարունակում սույն հոդվածի երկրորդից
հինգերորդ մասերի հատկանիշները՝ առաջացնում է տուգանքի նշանակում՝ սահմանված
նվազագույն աշխատավարձի հարյուրհիսնապատիկի չափով: Նույն հոդվածի 2-րդ մասի
համաձայն՝ սույն հոդվածի առաջին մասով նախատեսված արարքը կատարելը, եթե վարորդի
արյան մեկ լիտրի մեջ մաքուր ալկոհոլի պարունակությունը գերազանցում է 1 գրամը կամ եթե
նրա մեկ լիտր արտաշնչած օդի մեջ մաքուր ալկոհոլի պարունակությունը գերազանցում է 0.5
միլիգրամը՝ առաջացնում է տրանսպորտային միջոցներ վարելու իրավունքից զրկում՝ մեկ
տարի ժամկետով:

Ուսումնասիրությամբ պարզվել է, որ 05.09.2020թ. ժամը 05:50-ի սահմաններում Երևան
քաղաքի Դավիթ Անհաղթի փողոցում քաղաքացի Սմբատ Այրումյանի վարած <<HYUNDAI>>
մակնիշի 36UX484 հաշվառման համարանիշի ավտոմոբիլը կանգնեցվել է Ճանապարհային
ոստիկանության ՃՊԾ 1-ին սպայական գումարտակի 8-րդ սպայական դասակի տեսուչներ,
ոստիկանության լեյտենանտ Հ.Արշակյանի և ոստիկանության ավագ լեյտենանտ
Ա.Հովհաննիսյանի կողմից ուժեղացված ծառայության շրջանակներում: Ստուգումից պարզվել
է, որ վարորդի արտաշնչած 1 լիտր օդում պարունակվել է 0.665 մգ/լ ալկոհոլ, ինչի հիմքով
կազմվել է համապատասխան արձանագրություն և Վարչական իրավախախտումների
վերաբերյալ ՀՀ օրենսգրքի 126-րդ հոդվածի 2-րդ մասի համաձայն կայացվել է ԱՖ470983
որոշումը:

Ճանապարհային ոստիկանության ծառայողների կողմից տրված պարզաբանման
համաձայն՝ քաղաքացի Սմբատ Այրումյանի վարած <<HYUNDAI>> մակնիշի 36UX484
հաշվառման համարանիշի ավտոմոբիլը կանգնեցվել է ուժեղացված ծառայության
շրջանակներում: Ստուգումից պարզվել է, որ վարորդն ավտոմոբիլը վարել է ոչ սթափ
վիճակում, ինչը հիմնավորվում է <<Jupiter>> տեսակի թիվ 861723 գործարանային համարի

<<Ակկոտեստեր>> սարքով անցկացված սթափության աստիճանի զննությամբ, որի արդյունքում պարզվել է, որ վարորդի 1լ արտաշնչած օդի մեջ ալկոհոլի պարունակությունը կազմում է 0.665 մգ/լ, որի հիման վրա ոստիկանության ծառայող Հ.Արշակյանը կազմել է համապատասխան արձանագրություն: Ոստիկանության ծառայողները նշել են նաև, որ իրենց և վարորդի միջև ծառայողական բնույթի խոսակցություններից բացի այլ խոսակցություններ տեղի չեն ունեցել և ներկայացրել են <<Jupiter>> տեսակի թիվ 861723 գործարանային համարի <<Ակկոտեստեր>> սարքի ստուգաչափման մասին թիվ 023224 վկայականը, որն ուժի մեջ է 04.11.2019թ.-ից մինչև 04.11.2020թ.-ը:

Վարչական իրավախախտումների վերաբերյալ ՀՀ օրենսգրքի 17-րդ հոդվածի համաձայն՝ դիմումատուի կողմից թույլ տրված վարչական իրավախախտումը կարող է համարվել ծայրահեղ անհրաժեշտության վիճակում կատարված, եթե այն կատարվել է մի այնպիսի վտանգ վերացնելու համար, որը տվյալ հանգամանքներում չէր կարելի վերացնել այլ միջոցներով:

<<Վարչարարության հիմունքների և վարչական վարույթի մասին>> օրենքի 43-րդ հոդվածի 3-րդ մասի համաձայն, եթե նույն հոդվածի 1-ին մասի «բ» կետով նախատեսված դեպքում վարչական մարմնի կողմից քննարկվող փաստական հանգամանքների վերաբերյալ տվյալներին (տեղեկություններին) վարչական մարմինը կարող է իրազեկ դառնալ բացառապես տվյալ անձի միջոցով, ապա ապացուցման պարտականությունը դրվում է այդ անձի վրա:

Այսպիսով, դիմումատուի արարքում առկա է Վարչական իրավախախտումների վերաբերյալ ՀՀ օրենսգրքի 126-րդ հոդվածի 2-րդ մասով նախատեսված զանցակազմը, ուստի ելնելով վերոգրյալից, նկատի ունենալով, որ դիմումատուի կողմից չեն ներկայացվել իր համար բարենպաստ փաստական հանգամանքների առկայության վերաբերյալ ապացույցներ և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 05.09.2020թ. կայացված ԱՖ470983 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Սմբատ Այրումյանին և Ճանապարհային ոստիկանության ՃՊԾ 1-ին սպայական գումարտակ:



Ե. Կարապետյան